



Seksyen 2

Dasar dan Program Pembangunan PKS

Bab
EMPAT

Program Pembangunan

PKS dan Keusahawanan
pada Tahun 2018

Bab
EMPAT

Program Pembangunan PKS dan Keusahawanan pada Tahun 2018



Membentuk 98.5% daripada pertubuhan perniagaan di Malaysia, sektor PKS telah memainkan peranan yang penting dari segi pengeluaran, mewujudkan pekerjaan, eksport serta pengagihan kekayaan saksama yang akan memastikan pembangunan yang mampan dan inklusif, terutamanya dengan menyediakan peluang kepada usahawan berpotensi.

Walau bagaimanapun, populasi PKS adalah sangat pelbagai dari segi industri, sektor, umur, saiz dan model perniagaan. PKS juga mempunyai keperluan yang berbeza bergantung kepada tahap perkembangan mereka. Variasi ini mewajarkan supaya strategi yang disasarkan tidak direka khusus berdasarkan perspektif satu saiz untuk semua.

Bagi memastikan PKS terus berjaya, Kerajaan akan meneruskan usaha untuk mendorong pertumbuhan yang lebih baik dengan menyediakan sokongan menerusi dasar strategik untuk pembiayaan, infrastruktur, penerapan teknologi dan inovasi, pembangunan modal insan, akses kepada pasaran serta transformasi persekitaran perundangan dan pengawalseliaan untuk menggalakkan pemformalan perniagaan.

Bagi tahun 2018, Kerajaan melaksanakan program pembangunan PKS merentasi semua sektor ekonomi selari dengan objektif Pelan Induk PKS (2012-2020). Fokus bagi program PKS pada tahun 2018 diteruskan dalam enam bidang yang dianggap penting untuk pembangunan PKS, iaitu akses kepada pembiayaan, penerapan teknologi dan inovasi, akses kepada pasaran, pembangunan modal insan, infrastruktur serta persekitaran perundangan dan pengawalseliaan. Sejumlah RM13.7 bilion telah diperuntukkan untuk melaksanakan 153 program dengan 637,808 benefisiari.

Akses kepada program pembiayaan terus menerima sebahagian besar dana dengan jumlah sebanyak RM13.0 bilion (95.1% daripada keseluruhan jumlah perbelanjaan kewangan) untuk 44 program yang memberi manfaat kepada 424,115 penerima. Sejumlah 40 program pembangunan modal insan telah dilaksanakan dengan jumlah perbelanjaan sebanyak RM361.2 juta dengan 130,605 benefisiari manakala RM159.3 juta telah dibelanjakan untuk melaksanakan 28 program penerapan teknologi dan inovasi untuk 32,683 benefisiari. Sebanyak 27 program akses kepada pasaran telah dilaksanakan dengan perbelanjaan sebanyak RM77.6 juta bagi membantu 50,197 PKS manakala RM69.2 juta telah disediakan untuk 13 program infrastruktur untuk 208 benefisiari. Satu program persekitaran perundangan dan pengawalseliaan telah dilaksanakan pada tahun 2018 dengan dana sebanyak RM8.0 juta.


Jadual 4.1: Program Pembangunan PKS pada Tahun 2018 mengikut Bidang Tumpuan

Bidang Tumpuan	Bilangan Program	Komitmen Kewangan (RM juta)	Bilangan Benefisiari
Akses kepada Pembiayaan	44	13,029.7	424,115
Pembangunan Modal Insan	40	361.2	130,605
Penerapan Teknologi dan Inovasi	28	159.3	32,683
Akses kepada Pasaran	27	77.6	50,197
Infrastruktur	13	69.2	208
Persekitaran Perundangan dan Pengawalseliaan	1	8.0	-
Jumlah	153	13,704.9	637,808


Carta 4.1: Komitmen Kewangan mengikut Bidang Tumpuan (%)



Carta 4.2: Program mengikut Bidang Tumpuan (%)



Carta 4.3: Benefisiari mengikut Bidang Tumpuan (%)



PEMBANGUNAN MODAL INSAN

Tumpuan kepada pembangunan modal insan mencerminkan penekanan berterusan oleh Kerajaan terhadap meningkatkan tahap produktiviti negara, khususnya PKS. Perhatian yang menyeluruh diberikan oleh Kerajaan kepada PKS bukan sahaja untuk memperdalam kemahiran keusahawanan pemilik perniagaan, tetapi juga untuk membangunkan dan memperkuat strategi bakat mereka untuk memanfaatkan potensi penuh modal insan mereka bagi memacu perniagaan ke hadapan. Pada tahun 2018, sejumlah RM361.2 juta telah dibelanjakan untuk 40 program dengan jumlah beneficiari sebanyak 130,605 di bawah bidang ini. Antara program pembangunan modal insan adalah:

- Majlis Amanah Rakyat (MARA) membelanjakan RM44.5 juta untuk mengendalikan **program pembangunan usahawan** untuk 56,846 orang usahawan Bumiputera. MARA telah menetapkan sasaran membangunkan 51,338 orang usahawan Bumiputera pada tahun 2018 dan jumlah terkumpul sebanyak 77,200 usahawan di antara tahun 2016-2020.
- Pihak Berkuasa Kemajuan Pekebun Kecil Perusahaan Getah (RISDA) melaksanakan Program **Aktiviti Ekonomi Tambahan** berdasarkan premis yang mengoptimumkan sumber sedia ada untuk memaksimumkan pendapatan. Program ini menyokong pekebun kecil untuk menjalankan aktiviti ekonomi tambahan untuk meningkatkan pendapatan mereka dengan menyediakan bantuan kewangan dalam bentuk jentera, peralatan dan bahan mentah. Objektif program ini adalah untuk mendorong pekebun kecil menjadi lebih dinamik, inovatif dan bersifat keusahawanan. Pada tahun 2018, program ini telah membantu 1,565 beneficiari dengan perbelanjaan berjumlah RM15.5 juta.

- **Program Latihan Eksport** yang dilaksanakan oleh Perbadanan Pembangunan Perdagangan Luar Malaysia (Malaysia External Trade Development Corporation, MATRADE) telah menjadi platform untuk melengkapkan PKS bagi meningkatkan keupayaan eksport mereka. Pada tahun 2018, RM0.1 juta telah dibelanjakan untuk program ini dengan 2,301 peserta.
- Program **Sistem Latihan Dual Nasional (National Dual Training System)** yang diterajui oleh Jabatan Pembangunan Kemahiran di bawah Kementerian Sumber Manusia telah menawarkan latihan untuk lepasan sekolah dan pengangur untuk meningkatkan kemahiran mereka dengan objektif menyediakan pekerja terlatih untuk memenuhi permintaan pekerja PKS. Pada tahun 2018, RM40.0 juta telah didedikasikan untuk program yang memberi manfaat kepada 7,274 orang peserta.
- Program **Latihan dan Peningkatan Kemahiran Usahawan Inap Desa**, yang diterajui oleh Kementerian Pelancongan, Seni dan Budaya telah direka bentuk untuk memupuk budaya keusahawanan dalam kalangan pengendali inap desa serta meningkatkan kualiti perkhidmatan mereka. Pada tahun 2018, sejumlah RM0.3 juta telah dibelanjakan untuk mengendalikan latihan bagi 1,941 beneficiari.

PENERAPAN TEKNOLOGI DAN INOVASI

Masa telah membuktikan bahawa inovasi nyata sekali meningkatkan produktiviti dan memudahkan pertumbuhan perniagaan merentasi semua sektor. Kadar kemandirian juga lebih tinggi dalam PKS yang berinovasi kerana mereka lebih cenderung untuk menyesuaikan diri dengan keadaan pasaran yang mencabar dan menawarkan sesuatu yang baharu untuk terus berada di hadapan. Atas sebab ini, Kerajaan terus memberi penekanan kepada meningkatkan program penerapan teknologi dan inovasi PKS. Pada tahun 2018, sejumlah RM159.3 juta telah disediakan untuk membayai 28 program penerapan teknologi dan inovasi, dengan 32,683 PKS terlibat. Beberapa program yang dilaksanakan pada tahun 2018 termasuk:



- Program **Meningkatkan Penerapan eDagang PKS** yang diterajui oleh Perbadanan Ekonomi Digital Malaysia (Malaysia Digital Economy Corporation, MDEC) telah menetapkan matlamat untuk menggalakkan PKS mencebur eDagang. Pada tahun 2018, program ini dilaksanakan dengan perbelanjaan kewangan sebanyak kira-kira RM0.9 juta dan memanfaatkan 30,261 beneficiari.
- **Program Peningkatan Enterpris Bumiputera (BEEP)**, yang diterajui oleh SME Corp. Malaysia, bertindak sebagai platform untuk membangunkan PKS Bumiputera yang berpotensi di seluruh negara. Program ini menawarkan PKS Bumiputera yang terpilih satu pakej bantuan komprehensif yang merangkumi bantuan kewangan dan khidmat nasihat. Pada tahun 2018, BEEP telah dilaksanakan dengan perbelanjaan kewangan sebanyak RM22.0 juta untuk 263 beneficiari.

- **Sistem Teknologi Pintar MARii (MITS)**, program produktiviti yang diterajui oleh Institut Automotif, Robotik dan IoT Malaysia atau MARii (sebelum ini dikenali sebagai Institut Automotif Malaysia, MAI) untuk vendor tempatan mendapatkan pengalaman pengkomputeran i-Cloud dan 3D telah dilaksanakan dengan perbelanjaan sebanyak RM2.2 juta yang memberi manfaat kepada 290 beneficiari.
- Program yang dikendalikan oleh Institut Penyelidikan dan Kemajuan Pertanian Malaysia (MARDI) menyediakan **khidmat nasihat, analisis produk, klinik, seminar** dan **latihan penempatan** untuk usahawan sedia ada dan usahawan yang beraspirasi. Pada tahun 2018, program MARDI memberi fokus kepada menyediakan khidmat nasihat teknikal untuk usahawan sedia ada dan beraspirasi; menjalankan seminar dan bengkel teknologi untuk usahawan; penilaian kualiti produk; menjalankan lawatan teknikal dan pemantauan berkala terhadap prestasi usahawan; mewujudkan PKS baharu berdasarkan teknologi dan usahawan mikro; dan menyelesaikan isu teknikal di tapak penempatan untuk usahawan. Pada tahun 2018, kira-kira RM0.6 juta dibelanjakan untuk membiayai aktiviti-aktiviti ini untuk 497 beneficiari.
- Pada tahun 2018, Lembaga Perindustrian Kayu Malaysia telah menjalankan lima program **pembangunan reka bentuk dan penjenamaan produk TANGGAM** yang melibatkan pemadanan perniagaan di antara pereka dan PKS, pembangunan prototaip serta mengadakan pertandingan reka bentuk perabot, bengkel reka bentuk dan pameran. Dengan perbelanjaan sebanyak RM0.7 juta, program ini telah membantu 345 beneficiari pada tahun 2018.

AKSES KEPADA PASARAN

Dalam era masyarakat dunia semakin dekat hari demi hari dibawa oleh kemajuan teknologi dalam dunia digital, salah satu keutamaan agenda ekonomi Kerajaan adalah untuk merangsang penglibatan PKS Malaysia dalam pengantarabangsaan dan perdagangan merentasi sempadan. Oleh itu, langkah-langkah sokongan bagi PKS untuk mengemudi arah menerusi kerumitan rantai nilai yang semakin meningkat perlu berkembang sewajarnya. Pada tahun 2018, komitmen pembiayaan sebanyak RM77.6 juta telah digunakan untuk membiayai 27 program akses kepada pasaran untuk 50,197 beneficiari. Antara program pada tahun 2018 adalah:

- Program **Pameran Satu Daerah Satu Industri (SDSI)** yang diterajui oleh Bahagian Usahawan Bumiputera, Kementerian Pembangunan Usahawan telah menjadi platform untuk memudahkan perolehan sumber dan pemasaran produk dan perkhidmatan yang berkualiti tinggi di samping meningkatkan rangkaian dalam kalangan usahawan yang menyertai program untuk mewujudkan usahasama antara peniaga tempatan dan antarabangsa. Dengan perbelanjaan kewangan berjumlah RM2.4 juta, program ini telah membantu 795 beneficiari pada tahun 2018.
- **Geran Pembangunan Pasaran (MDG)** menyediakan bantuan kepada PKS, penyedia perkhidmatan, persatuan perdagangan dan badan profesional untuk menjalankan aktiviti pembangunan eksport. Diuruskan oleh MATRADE, sejumlah 1,203 beneficiari telah menerima bantuan menerusi program ini dengan perbelanjaan kewangan sejumlah RM16.3 juta pada tahun 2018.

- Program **Latihan berkaitan Kualiti dan Keselamatan kepada Pemasar** bertujuan untuk meningkatkan penerapan teknologi dalam amalan pemasaran dan pasca penuaian, menetapkan peraturan dan piawaian untuk keselamatan dan kualiti produk serta memastikan pematuhan terhadap peraturan dan undang-undang perdagangan antarabangsa. Diterajui oleh Lembaga Pemasaran Pertanian Persekutuan (FAMA), program ini telah menggunakan RM0.7 juta pada tahun 2018 untuk membantu 6,904 benefisiari.
- Program **Pengukuhan Bekalan Ladang Kontrak ke Pasar Tani (KUKUH)** yang diterajui oleh FAMA bertujuan untuk mendapatkan pengeluaran tanaman bagi memperluas pasaran. Selaras dengan objektif ini, KUKUH juga memfokuskan kepada pembangunan infrastruktur patuh-GMP untuk pemasaran sayur-sayuran dan buah-buahan untuk mendapatkan pasaran luar negara. Sebanyak 6,378 benefisiari telah menyertai program ini dengan perbelanjaan sebanyak kira-kira RM0.5 juta pada tahun 2018.
- Perbadanan Kemajuan Kraftangan Malaysia (Kementerian Pelancongan, Seni dan Budaya), memberikan sokongan untuk membantu meningkatkan jualan kraf tempatan dalam pasaran domestik dan antarabangsa menerusi **Program Pemasaran Kraf**. Pada tahun 2018, RM4.2 juta telah dibelanjakan untuk menjalankan program ini untuk 1,562 benefisiari.



INFRASTRUKTUR

82

Penyediaan infrastruktur yang baik untuk PKS terus menjadi tumpuan untuk memudahkan aktiviti perniagaan. Pada tahun 2018, RM69.2 juta telah dibelanjakan untuk 13 projek dan membantu 208 benefisiari. Program-program yang dilaksanakan pada tahun 2018 termasuk:

- **Pembangunan Kilang Siap Bina Industri Kecil dan Sederhana untuk Bumiputera di Kawasan Perindustrian Pasir Gudang** disediakan untuk pembinaan premis kilang untuk PKS Bumiputera di Kawasan Perindustrian Pasir Gudang, Johor, bagi mewujudkan peluang perniagaan untuk penduduk tempatan serta menjana pekerjaan. Pada tahun 2018, komitmen sebanyak RM30.0 juta telah diberikan kepada program ini, yang diterajui oleh Johor Corporation.

- **Pembangunan bagi Lot Kedai di Jeli dan Kilang PKS di Pengkalan Chepa** yang diterajui oleh Perbadanan Kemajuan Negeri Kelantan, menyediakan premis yang kondusif untuk aktiviti perniagaan kepada perusahaan mikro dan PKS dalam sektor pembuatan. Pada tahun 2018, perbelanjaan sebanyak RM12.2 juta telah direkodkan untuk program ini.
- Perbadanan Kemajuan Negeri Kelantan menerajui **Penaikan Taraf Premis Perniagaan di Kelantan** yang melibatkan penaikan taraf pasar basah Berek 12 di Kota Bharu dengan kos RM5.7 juta untuk memanfaatkan 180 usahawan mikro.
- **Hartanah PROSPER** dilaksanakan oleh Perbadanan Usahawan Nasional Berhad (PUNB) untuk membeli premis runcit di lokasi strategik untuk meningkatkan pemilikan Bumiputera dalam hartanah komersial. Pada tahun 2018, RM3.2 juta telah digunakan untuk program ini.
- Perbadanan Pembangunan Ekonomi Sabah (SEDCO) telah melaksanakan program **Pembangunan Premis Perniagaan** yang menyediakan premis perindustrian bagi usahawan di Taman Perindustrian PKS SEDCO. Pada tahun 2018, RM4.0 juta telah didedikasikan untuk program ini.
- Jabatan Kemajuan Orang Asli (JAKOA) menerajui program **Pembinaan Premis Perniagaan** untuk usahawan Orang Asli. Perbelanjaan sebanyak kira-kira RM0.2 juta telah dicatatkan pada tahun 2018 untuk membantu lima benefisiari.



PERSEKITARAN PERUNDANGAN DAN PENGAWALSELIAAN

Hanya satu program persekitaran perundangan dan pengawalseliaan dilaksanakan pada tahun 2018 iaitu **HIP 1: Integrasi Pendaftaran dan Pelesenan Perniagaan** yang direka untuk mencipta satu gerbang untuk kedua-dua pendaftaran dan pelesenan perniagaan bagi menggalakkan pemformalan dan pembentukan perniagaan. Perbelanjaan sebanyak RM8.0 juta telah disediakan untuk program yang diterajui oleh Unit Pemodenan Tadbiran dan Perancangan Pengurusan Malaysia (MAMPU) dengan kerjasama SME Corp. Malaysia.